

三省山内風土雜識



關中叢書

三省山內風土  
雜識

邵力子署

三省山內風土雜識

溆浦嚴如煜撰

陝西之漢中興安商州四川之保寧綏定夔州湖北之鄖陽宜昌地均犬牙相錯其長林深谷往往跨越兩三省難以界劃故一隅有事邊徼悉警守土之吏疆域攸分卽能固圉保民詎能越境而謀故講又安之策必合三省通籌之也

天文井宿次未午二宮分度最廣商州在井一度漢中興安在井三度保寧在井十三度夔州綏定二府均在翼十七度而奉節巫山大寧雲陽梁山萬縣又在翼十六度鄖

陽府之鄖縣在星六度房縣保康在張一度竹山張二上  
津張三鄖西竹溪在張四聖人仰觀俯察休咎之徵鑿諸  
儀象任邊防之重者不可不隨時占候也

南山在陝西西安府之南山高而長阮亭所云終南雲物  
一千里是也西爲太白山北爲華嶽祖山由秦隴而來踰  
北棧經寧陝孝義東出商洛融結河南諸山鎮安洵陽漢  
陰石泉洋縣各山皆其支分別派穹巖邃谷老林深箐多  
人跡所不至時虞伏莽故往史所稱動曰南山盜賊  
南山專屬陝西在渭河東南漢江之北其由漢江南渡徑  
至岷江北岸陝則興安平利白河定遠西鄉寧羌川則保

寧綏定太平夔州湖則鄖陽之房縣竹山竹谿宜昌之歸  
州巴東興山均在江漢之間其山之最鉅有名者曰大巴  
山大約自秦階折而東爲略陽之仇池經寧羌南鄭城固  
至定遠巴州凡川東北陝興安湖鄖陽宜昌各山皆其支  
分別派而下結爲均州之武當巴山老林跨川陝兩省周  
遭千餘里老樹陰森爲太古時物春夏常有積雪山幽谷  
暗入其中者蒙蔽不見天日官府稽防難周宜其爲逋逃  
藪也

西安之咸陽藍田盩厔鄠縣鳳翔之寶鷄郿縣均在山外  
而縣轄地方往往錯入山內盩厔咸陽往時所轄入山至

二三百里故有鞭長莫及之患川陝各山峻削挺拔非如  
東南坡坨蜿蜒易於攀躋由華州經藍田至寶鷄共七十  
二峪口山賊窺伺內地必由峪口而出故當辦理賊匪之  
時防其竄突於各峪口亦徧設卡倫以重省城門戶  
寧陝廳爲西安府所轄舊本長安縣地距省城三百六十  
里在南山中四面高山峻嶺道路極其崎嶇畢撫軍奏設  
廳治近又添設總兵大營兵威雄盛足爲省城藩籬  
孝義廳亦西安府所轄本咸寧縣地畢撫軍分設廳治  
舊在大山礫下城垣逼仄高山俯臨如坐甕底近移建在  
舊縣關地勢略爲寬廠而溪流衝激城基難以完固

由寶鷄縣渡渭河進山經草涼驛黃牛堡過鳳縣古陳倉  
留壩廳至褒城縣山程五百里爲北棧道山峻水急其中  
多巉巖壁立難以鑿路募匠錘石成孔橫貫巨木上覆木  
板外作欄杆繞之如橋梁狀故名曰棧道其中最險曰煎  
茶坡大散關鳳嶺柴關馬道二十四嶠鷄頭關均爲一夫  
當關萬夫莫開聞父老言數十年前古木叢篁遮蔽天日  
近爲川楚棚民開墾路雖崎嶇而樹木已稀惟柴關一處  
尙有古木數千章

棧道之西爲秦隴階文各州縣而東則南山老林山聖谷  
口處處可以躡越故賊匪東西奔竄防堵爲難



由褒城而西南過沔縣寧羌爲往四川大路東行四十里至漢中府府治東有饒風南橫大巴北阨大散西拒仇池漢江橫貫其中最爲形勝其中南鄭城固洋縣西鄉褒城沔縣周圍七八百里一望平蕪地美民殷風物絕似江南故漢高因之以成帝業而武侯北定中原亦屯軍於此晉宋以後爲梁州唐更名興元

興安古金州地舊爲州治隸漢中畢撫軍奏請改州爲府由漢中東行經城固洋縣石泉漢陰陸路八百餘里水路一千三百餘里中有渭門子午谷饒風嶺諸險而饒風尤峻卽吳玠據以拒撒離喝者但此路尙爲平夷不似棧道

之寸寸皆山也

興安府治在漢江之南地勢寬敞新城係磚砌頗堅固爲總鎮營兵駐紮府治本無城秦撫軍防堵教匪之時築土牆以守沿舊號曰老城山內土性不堅夏秋霖雨輒有坍塌邊徼重地宜爲未雨綢繆者

興安所轄六屬地方遼闊水田不逮漢中甚遠其中宜稻者惟漢陰一廳次則安康平利又次石泉縣間產稻穀洵陽白河不過三數村落有水田矣惟山內五種皆宜大麥包穀薄種厚收閭閻饘粥尙爲易謀

興安往西安大道由漢中一千八百餘里故於山中另闢

新路由洵陽之趙家灣兩河關經過鎮安孝義出大峪口

山程約七百里較棧道捷甚然鳥道羊腸中如九里崗琉

璃溝安判官嶺仙人碓陽梅花鋪鷄上架鎮安猴子石大山

礫孝義高峻嶮巖闢一徑於樹根石角之間稍不戒則人馬

均墮非如棧道地雖險而路寬也故招解人犯仍由漢中

大道

定遠廳在漢中府南漢中之西鄉縣地方遼闊周圍二千  
餘里嘉慶八年奏將山內地方分設撫民同知廳治在固  
鄉營距西鄉縣二百九十里至四川太平廳二百四十里  
沿邊東接毛壩關南繞鹽場平落西歷黎壩白楊關北至

菩提河共計入百八十里與四川之太平巴州通江南江  
接界內有星子山老林約二百餘里其大巴山則在定遠  
者四百餘里西鄉之險峻盡分廳治而西鄉成腹地矣

定遠山大林深然過一高山卽有一田坪星子山之東爲  
楮河廳西爲九軍三壩南爲漁肚壩平落鹽場西南爲仁  
村黎壩均有水田宜稻九軍壩產稻最美其粒重於他處  
漁肚壩楮河平落鹽場周圍各數十里俗稱萬石平落五  
千鹽場但各鄉雖產穀而距廳治遠阻隔大山轉運爲難  
廳治之固鄉營水田僅數百畝故仍有艱食之虞

又西鄉遊擊營設於定遠未分之先定遠設廳治而軍制

仍舊僅一都司營額兵五百分佈於川邊八九百里之間  
又先設姚家壩簡池壩兩巡檢距廳治皆二百餘里人煙  
稀少嘉慶九年方撫軍奏移姚家壩巡檢安設漁肚壩簡  
池壩巡檢安設黎壩均在廳城西南一百里內外定遠捐  
修廳城兩巡檢分防之地亦爲代修石堡三城鼎峙頗資

犄角矣

十三年西鄉遊擊移安定遠

漢中府之鳳縣東南爲南山老林由城西進山溝約百餘  
里至甘肅之兩當再西爲徽成二縣毗連秦州山賊之竄  
甘省多取道於此故於縣治增設漢鳳營

留壩廳在棧道中西有紫柏山高數十里青巒聳拔上插

雲霄相傳爲張子房辟穀處廳治湫隘兩面高山中間溪流湍激向無城垣故賊頻滋擾

廳東北九十里江口爲南山扼要之區廳西黑河一帶上接鳳縣下通褒沔西與甘省毗連密林深谷綿亘數百里極爲幽險最宜防範黑河今爲鳳沔略轄設有鐵爐川守備營

褒城之馬道相傳爲蕭相國走馬追淮陰侯處就驛結堡人烟較縣治爲多留壩廳境絕少水田川楚棚民轉徙開墾土著十無一二五方雜處易生事端善後案內添設營兵近已籌設城垣崇墉屹屹庶折侮亂之萌

鷄頭關在褒城北一十里危峯竦峙下臨絕澗洵天險也  
東南數十里一望平蕪頗稱膏沃黃官嶺與川之廟壩鐵  
爐壩相近稽防宜嚴

定軍山在沔縣山不甚高古木幽篁蔚然深秀縣東北與  
褒城南鄭相連者平原腴腴水田亦美惟剛廠一處與黃  
官嶺聲息相連而西境由褒城上接黑河連峯疊嶂易以  
藏奸

略陽據秦隴之中昔光武征隗囂得略陽而囂懼嘉陵江  
襟帶城西另有小河一道繞城東而下渡嘉陵江西進至  
白馬關爲甘肅要衢邑有仇池四面陡險上頗平敞有泉

有田往時武都羌據以爲固者邑境山壤堯塙沿途絕少  
水田仇池今在甘肅

寧羌州當川省入陝首站州境遼闊綿延數百里黃壩扼  
巴蜀之咽喉陽平爲秦隴之門戶荒耳山茅壩子板倉壩  
一帶與廣元昭化之荷葉嶺石龍壩城牆巖犁壩各處壤  
地相錯山幽谷深易以藏奸有水田稻出無多僅供本地  
需用

南鄭城固平蕪相接錦陌綺阡爲漢中膏沃北山漢山亦  
無阻險可憑城固之二郎壩接連留壩之江口此路頗稱  
幽峻



漢中古梁州洋縣古洋州唐時屢爲駐蹕之地東南西三面均有平壤水田足稱膏沃北路進牛羊嶺麻莊河麻兒溝一帶大山數百里與西安之長安整厓接界內多未闢老林近於華陽地方建土堡一座添設文武官弁而地大林深彈壓非易

禹貢華陽黑水惟梁州黑水卽留壩黑河在梁州西北華陽在梁州東華山之陽爲南山故華陽正在南山旁北與五郎之江口厚畛子各營相連由華陽前進處處老林嶮巖幽暗爲南山深處矣

西鄉在漢江南沃野百里良田千頃漢中之華腴也自定

遠設廳邊防盡歸定遠雖堰口峽口細辛壩諸要隘時防  
山寇躡入而禦賊當在門牆之外嚴定遠之防維則西鄉  
自可固圉也否則龍池壩馬家壩箭桿山各險與賊共之  
到處可以竄越定遠瘠甚割西鄉隸之則廳縣雖分事權  
歸一籌辦自易矣

陝省入川之路其由寧羌廣元棧道而前者正道也而奇  
兵往往由西鄉而進漢昭烈取漢中大軍發葭萌關張桓  
侯由西鄉一路後西鄉爲桓侯封邑定遠之扯旗溪拴馬  
嶺各處尙有桓侯遺跡明時川賊鄔本恕犯漢中流賊張  
獻忠入川並總兵左良玉等扼賊力戰亦多在漁肚壩路

定遠之設廳控制洵安邊遠猷也

武侯伐魏魏延請以五千人間道由子午谷徑襲長安考西鄉之子午谷在漢江北與西安府之子午峪相對由山路徑進至長安不過七八百里但翻山越嶺必須裹毡束馬而行者非止一處出險之後距長安雖不遠時關中久爲魏有夏侯惇雖駑才長安豪傑豈無相共爲守者仲達用兵神速觀其七日而破新城則武侯之拒而不納未必非慮延之爲孟達續也

石泉在漢江北岸縣本無城縣令李煥樞籌修治東南與漢陰連界頗有水田餘則崇山峻嶺一望巒岫西往西鄉

有饒風關高五六里石磴盤折其險可守由饒風北進山  
爲興安往五郎之路中有雲霧山山河界貓兒嶺諸險均  
極幽峻四畝地營與五郎聲息相通尤爲必守之要四面  
老林一二棚民之外別無土著稽防稍疎輒起寇心

漢陰本興安州轄興安陞府漢陰分爲廳治地勢平坦中  
有月河一道利資灌溉春時水田漠漠風景絕似湖鄉廳  
北各山亦與五郎相連漢王城古跡在廳南漢江之上  
紫陽縣治在漢北小阜之上縣轄地方多在漢江南岸山  
地瘠薄與石泉相類產茶性寒敗胃亦其山高故也定遠  
之星子山東折入縣境故亦有未關老林南之二州堙西

南之麻柳壩茅壩關與川省太平廳城口一帶毗連山深林大川匪出沒往往伏莽攫人

紫陽扼要之地又有鐵佛寺班鳩關東南近安康有大山曰五朵雲林深路峻上廣數十里賊匪伏匿官兵搽捕經時

興安改府之後安康爲附郭首邑縣境遼闊西往漢中一路恆口地勢平坦頗有水田西北王莽山牛山鸞崖翠嶺爲終南之分支松樹壩上下團山與洵陽鎮安孝義接界林幽谷深奸徒易以伏匿傳家河一路由山溝中行地雖幽暗路頗平夷故避兩河關之險者由鎮安取道於此徑

達興安漢陰

安康南與平利西與紫陽交界西南至南天門與四川之  
太平廳交界密地數百里崇山峻嶺溝洫分歧有滔河嵐  
河大道河等名其間以磚坪爲扼要之地距郡城二百二  
十里沿溪兩岸有零星水田安康設縣之初特爲分駐縣  
丞近又加設營員地當川陝奧區匪徒出沒控制爲難

平利縣治舊在興安郡城南九十里城址逼仄四面大山  
俯臨縣治南九十里曰白土關據湖陝之衝再南四十里  
踰界嶺卽爲湖北二竹地地勢平衍水田甚美改建縣治  
於此溪水一道下爲洵陽之壩河北注漢江可通小舟中

有石灘數處加以疏鑿則民商均便矣

平利所轄高山之中間有平原水田如曾家壩獅子壩風口壩等處各有水田數百頃與白土關均稱產穀之鄉平利北連安康東界洵陽東南接湖北之二竹西南與四川之太平大寧交界鎮平一隅尤深入川楚之中距縣治三百六十里鳥道一線盤折危巖峭壁之間鷄心嶺扼夔府大寧之路偏巖子通一碗泉汎平溪河入仙河與太平廳之城口黃墩相接處處老林內有化龍山尤爲幽峻匪徒出沒無常舊設巡檢專司稽防近添安大營擬設縣丞略資控制沿途之八卦廟孟石嶺散子坪等處亦爲要隘

洵陽在漢江北漢高祖遣酈商至郇關卽其地也縣治孤峯突兀夾以漢江洵河俗稱金線釣葫蘆其險可守邑北有陽山十二嶺亦南山分支尙有未闢老林兩河關爲由商洛入金洋必爭之險

洵陽西北與安康孝義鎮安東與山陽及湖北之鄖西南與白河西與平利西南與湖北之房縣竹山竹谿均皆接界犬牙相錯者共九邑與平利均爲陝邊重地地頗遼闊俗有八百里洵陽之稱山大谷深稽察難周往時楚匪潛入東路之西岔河竹筒河西路之壩河北路之乾溪河山民多被煽惑賊至附從爲亂故其被蹂躪者爲最烈也



由安康之二郎灘至白河交界之藍灘水程二百七十里漢江南北二岸均洵陽所轄他邑專防一岸洵陽於賊從南來則守北岸賊從北至又守南岸士民荷戈守卡祁寒暑雨數載無懈亦知切同仇之義矣

竹山洵陽分界之處曰七里關設守備駐防隸陝安鎮中營連山疊嶂道路極其崎嶇又有梓木樹堦扼竹谿之衝女媧山當平利通川之道均防範之不可疎者

白河縣在漢江南洵陽舊轄五里分一里爲白河東北與湖北鄖西鄖縣西南與湖北房縣竹谿交界幅員不過二三百里而山谷阻深由縣西麻湖溝而進紅石河白石河

界嶺關廟河各處楚匪潛竄易至煽惑滋事守土者時宜留心

商州在西安東南距省城平路三程由藍田縣進峪亦經過秦嶺秦嶺極其崔嵬在五郎孝義者上下均七八十里度嶺總須兩日蓋卽南山之正幹也嶺在商州者不甚高其上亦有韓文公廟商州城外地勢平敞宜麥粟各種間亦有稻田東爲豫省丁字關扼秦豫之衝東南至龍駒寨小河一道可通舟楫直達襄陽之老河口西商之貿易東南者多於此買舟雇騾人烟稠密亦小都會焉

商州卽楚地商於六百里張儀用以給懷王者地在楚則

關中之險楚與秦共之在秦則楚之防秦者多爲秦弱矣秦旣取之詎肯還之其後漢高祖之入關亦卽在此一路故商州也秦中必守之險州轄四縣鎮安居南山之中四通入達山陽商南與楚之鄖西上津接連雒南密邇豫州各邑均山大林深楚豫流民入山開墾者多取道於此良莠不齊稽防未可少疎

由甘肅之階州翻山西往四川龍安府路最崎嶇卽鄧艾襲蜀之陰平道

四川之太平廳舊本縣治軍興後改陞直隸廳賊匪滋事之始南江通江各邑縣治多被焚燬太平藉土牆以守得

以完固所管地極遼闊周遭一千七八百里近廳之數十里官渡灣一帶平原水田爲產穀鄉餘則多未開老林廳所轄之城口距廳三百七十里四面高山峻嶺中間一線溪流溪旁水田不多此地極其幽深俗稱八百里城口囑匪教匪往往伏匿

由城口之南經由乾龍坪明道井鶴鳴寺雪泡山高坪各處分路往雲陽開縣密地數百里均爲未闢老林路旁林邊行走往往數十里無人烟其間如鶴鳴寺雪泡山尤爲幽峻古木參天叢篁遍地賊伏竄其間踪跡難尋

由城口之東經由黃墩旗桿山汪家壩桃花壩過大團城

小團城至紅池壩老木園寶塔分路往夔府之大寧奉節  
鳥道羊腸崎嶇不易行矣而其增助地險總在沿途老林  
枝柯叢雜刺眼挂衣卽爲健者糾纏不得展布賊匪潛藏  
其中我軍無由得見賊從林內下視則纖細俱知於碕角  
轉灣之處依險鶻起貿貿前進輒墜術中

大團城四面陡削如壁上皆老林周圍二百餘里小團城  
山勢相類而差小賊匪伏匿其中砍樹闢地結棚住居其  
出入路徑蟠折林中均有暗記糧食斷缺出外分伏山徑  
擄劫行商掠近村居民搬運歸巢暇則演習鎗棍邊徼深  
處水土劣惡大軍不能久駐本地營汎兵單不敢深入伺

其出劫設法捕擒俾知警畏而已

由城口之北至兩扇門通陝西之興安高山夾峙中間危徑一線爲川陝必守之險

由城口東北經黃墩後坪至一碗泉中心石南通夔府之大寧奉節北過偏巖子至陝西平利縣之平溪東北過螞蝗壩至陝西平利縣之鎮坪東過徐家壩焦子壩通湖北竹山縣之巴豆園豐溪兩處山勢極其峻削均象形得名而當三省邊隅要路一夫荷戈武士千羣無所用之偶有騷動爲必守之險又徐家壩之鸛心嶺亦爲要隘

夔州府東界湖北巴東南界湖北恩施北界陝西平利西

扼本省之新寧形勢險阻爲川東門戶岷江貫其中奉節  
巫山雲陽萬縣開縣大寧各縣均在江北崇山峻嶺密地  
千里川中山多黃土不逮陝南山之沃而土性稍堅山民  
遇有溪泉之處便開墾成田故到處均有稻穀價值較陝  
省爲賤但各縣地均遼闊棚民雜處稽防爲難府城至成  
都一千七百里巫山大寧之屬相距在二千里外邊隅有  
警聲息難通

綏定府舊爲直隸達州嘉慶元年教匪滋事陞州爲府附  
郭爲達縣隸以東鄉新寧東界夔府西界渠縣南界大竹  
北界太平地居四達在岷江之北近府平原沃壤水田連

阡稻穀頗饒距府數十里外則連峯疊巘東鄉多有未闢  
老林山谷幽險易以伏奸棚民雜處稽察不可少疎府至  
成都一千二百餘里東鄉在府東北一百里新寧在府東  
南一百二十里

東鄉北由羅紋壩黃楊堡東北由回軍壩入臺山雙河口  
白沙均可至太平廳羅紋壩一路路雖崎嶇沿途尙有人  
烟回軍壩一路盤折山谷之中經過老林數處行人恆有  
戒心

保寧府古巴子國距成都六百二十里爲川北重鎮東界  
太平西界梓潼南界西充北界陝西寧羌棧道千里當雍



梁之衝所謂劍關重開蜀北門也水流湍激山勢嵯峨故一路號稱天險府東北四百里爲通江縣古宕渠地與陝西定遠廳接界北三百里爲南江縣亦宕渠地與陝西寧羌褒城南鄭均接界兩縣均無城郭縣治燬於賊邑各有大石寨倚山阻水環繞十數里天險可守百姓屯聚其間官弁卽僑居其間就近撫馭蜀山陡起陡落山麓稍平有溪泉澆漑便成水田二邑頗亦產穀長林深箐動輒數百里囑教各匪易於伏匿防檢不可少疎

通江之竹峪關與陝西定遠廳之九元關相距六十里川陝客民挾貲貿易者往往取道於此山高三十里上多青

柵樹林蒙密幽深往時亦有匪徒伏道攫取貨物上有關  
廟爲川北陝安兩道會哨彈壓之處滋事後賊匪出沒其  
間行旅稀少近於竹峪關築堡一座安設守備營陝省如  
再加防維則路途無阻矣

通江南江各道川客之赴漢江貿易者由竹峪關取道固  
鄉營道路紆回故於定遠簡池壩迤西經白楊關至菩提  
河於大巴山內砍伐老林另闢一道橫過老林約七八十  
里取道甚捷而極其幽暗常募土人護送

川中有東鄉有南鄉今陝西定遠廳之漁肚壩卽古南鄉  
舊治也大約大巴山所出各水在北者由西鄉注漢江在

南者由通南巴州而注嘉陵江歸於岷江漁肚壩黎壩之水均南入通江亦天之所以分川陝也

大巴山由定遠折入南江崔嵬巖削旁支分爲十二嶺一名小巫山俗稱大巴之險過於連雲棧其西與廣元接壤兩河口哨風樓一路通漢中之青石關昭化經城牆岩七眼洞一路至鐵爐壩亦與南鄭之巫山埡路通

巴州地極遼闊周圍約千餘里巴江可通舟楫平梁山四圍石壁如城宋末徙州治於此平原之中水田亦爲肥美而山多田少近太平定遠一帶崇山峻嶺尙多未開老林南棧由金牛驛入過五丁峽古稱五丁力士開山以迎金

牛者卽此經由陝西之寧羌州踰朝天嶺進廣元縣界則爲百丈關望雲關七盤關鋸山關劍門關均極崎嶇所謂蜀道之難難於上青天者

岷濤天險飛渡爲難故自來流匪之患恆在漢南江北卽保寧以下襟以嘉陵江者亦可沿岸防堵

川北川東風土與漢南相近自明以來荆襄流民卽聚此數郡之間明末遭張獻忠殺戮之慘遺民所存無幾承平旣久民多外省搬入而湖廣之人尤多以其壤地相連易於搬移也古稱蜀民好亂而楚人輕剽醇者燒荒墾田漸以富饒黠者邀結朋黨稽防少疎便成事端是在良司牧

之善爲駕馭撫綏也

鄖陽府春秋麋子庸人之地明成化時設府治領鄖縣鄖西房縣竹山竹谿保康六縣東界河南南陽府之淅川西界陝西興安府之平利南界襄陽府之均州北界陝西商州之商南道路四通山有黃龍白馬諸險漢江橫通其中夾河斗河南北交注爲楚邊之雄勝距武昌省城一千五百餘里

鄖陽山大林深明時荆襄流民聚處其中轉徙於陝之商漢川之夔達地險人衆往往煽惑生事項忠白圭之徒督諸軍討之旋服旋叛蓋痛加誅戮而所殺之數不敵新集

之多力爲驅遣則回籍之人仍存復來之志故迄無成效也後原傑集三省按撫會議將流民編成戶口分設縣治妙選賢能勤加撫治三省邊境藉以乂安者百數十年鄖撫之設卽始此時

自陝西興安至湖北襄陽共計一千三百里而鄖陽爲適中府城依山阻水形勢甚爲鞏固府上游諸山峻峭與川陝無異下游則坡坨起伏耐人尋玩矣鄖縣爲附郭首縣近郊多平原水田產稻頗佳

鄖西府北一百二十里縣治在漢江北山內距江岸數十里東與鄖縣南與陝西白河西與陝西洵陽北與陝西商

南山陽均皆接界舊本鄖縣上津之地明成化時原傑因其地太遼闊分設縣治崇山峻嶺道路崎嶇而山嶺之下多成平壩居民開成水田連阡踰陌故其產穀較勝洵陽山陽諸邑

鄖西扼湖陝之衝者曰南天門一天門二天門三天門之稱巉巖峻削共計數十里與洵陽之牛心石共爲天險鄖西舊本無城賊匪滋事時縣治被焚燬知縣孔繼澣領帑修建城垣團練民勇據險拒守賊魁齊王氏等爲其民勇所戮故鄖西鄉兵冠於楚北

上津舊本縣治後并入鄖西設巡檢分防知縣孔繼澣籌

修石堡一座屹立湖陝之間足壯聲援

鄖西之夾河在陝西白河縣之上三十里水注漢江可通舟楫沂流過上津至蠻川關起陸二百四十里至商州進西安省城通計由夾河起至咸寧峪口水陸八百餘里行旅避孝義秦嶺之險多取道於此興安之東道也

房縣本漢房陵魏新城地孟達之據以爲蜀魏輕重者也距府城三百二十里高山廣谷號爲奧區往代流匪往往盤踞其間板橋山九道梁等處地方幽險稽防未可少疎竹山竹谿爲古上庸地舊本一縣明原傑割竹山東南另設竹谿竹谿距府三百二十里竹山距府一百八十里東



與鄖縣北與陝西白河洵陽西與陝西平利交界南通四  
川大寧並宜昌之興山等縣當三省之邊徼地方最爲遼  
闊

竹山竹谿均舊本無城賊匪滋事縣治遭焚燬近皆籌修  
新城高垣崇墉極其鞏固兩邑風土略似民勤稼穡於山  
灣溪角盡墾水田其平原之中錦塍相接故其米穀之饒  
洵陽白河客民亦借資焉人輕生敢鬪陝西當鄉兵者多  
二竹鄖西之人頗得其力

竹山之關壘與洵陽之七里關毗連山勢險峻道路崎嶇  
爲湖陝扼要之處

竹谿南之匯灣西由紅石河至竹葉關通陝西平利縣之曹家壩八卦廟一帶由唐家坪經豐溪老爺頂巴豆園通四川大寧之蕭家坡徐家壩沿途密林深箐最爲幽險

竹山南由官渡過白河口至紅坪西折向家坡馬鬃嶺三層嶺與老爺頂路會由紅坪西南折過順水坪長嶺壩陰條嶺至烏雲頂與四川夔州府之黃草坪汎大昌營各路相通

由紅坪南行過高橋河至相思嶺陳家坡又東折過麻線坪下古坪國公坪至百里荒此數百里中老林深箐與陝西之化龍山四川之大小團城山勢相連向本無路摻捕

零匪開成小徑均極危險

宜昌府古丹陽地楚熊繹始封於此後又名夷陵西陵史稱秦代楚燒夷陵吳陸抗討步闡于西陵者卽此地舊爲州治改陞爲府東界當陽南界宜都北界南漳西界四川之巫山扼巴蜀之咽喉附荆襄之脊背枕山環江地險流激最爲形勝距武昌省城一千一百餘里

宜昌府城在大江北岸依山阻水雉堞連雲號稱鞏固府所轄東湖歸州興山巴東長樂均在江北鶴峯長陽二州縣在江南者與施南接界爲土官宣慰司舊地改土歸流江北數州縣接連四川之夔府本省之鄖陽山大林深亦

往時流民積聚之地故賊匪往來竄伏其間

歸州古夔子國地一名秭歸出師表所云秭歸蹉跎者卽此也濱臨大江距府一百二十里東湖歸州均有水田宜稻歸州西北一帶高山長谷與鄖縣無異控制不易

巴東漢巫縣地濱臨大江由四川之夔府大江東下至縣入湖北界邑有巴山又名金字山一峯分三岡而下形如金字縣治依之而向無郭垣故賊匪滋事之時縣治至被焚燬荆楚第一層門戶宜爲桑土之綢繆者

巴東樓船上巴西言川楚之相連也夷陵三峽之一宜都記稱黃牛灘東入西陵界一百里山水紆曲林木高茂哀

猿之聲巖谷響應行人聞之莫不懷土歸州之空舫峽尤絕岸峭立爲飛鳥所不能棲此路數百里均皆天險故自來蠻禍不能踰江北而流匪之患亦鮮至江南者

興山縣府北一百二十里在江北山內崇山峻嶺接連四  
川諸山道路詰曲扳躋爲難

由興山縣東北經由豐玉坪長房河一路可至鄖陽之房  
縣西北由伍家坪堆子場南陽河亦可至百里荒古木叢  
篁川楚極邊

由巴東之羅坪羅溪場北過麻線坪亦通相思嶺西由火  
峯翻界嶺下黃泡池通四川之觀音岩入石坪至大昌營

西北翻界河壩至琴樂坪過黃草坪通大寧縣之大寧廠  
此帶數百里中多未闢老林往時荆襄流民蔓延川東者  
必先集聚於此以次轉徙而西故賊匪之竄逸川楚者多  
取徑於此道路極險峻林木陰翳官軍往來追捕跋涉動  
經旬月征人之勞瘁可思矣

漢江發源蟠冢至褒城沔縣之間北棧黑河諸水注之始  
通舟楫東至漢中府城南冬春水涸磷磷淺瀨架木爲橋  
由漢中而下城固之文水壻水洋縣之芎溪大小龍溪西  
鄉之清涼川木馬河石泉之珍珠河紅河遲河紫陽之洞  
河玉河漢陰之月河安康之大小滔河嵐河黃楊河均注

於江其流稍大然江面不廣石擁沙積淺處仍可褰裳徑  
渡由興安府東下會合洵河斗河夾河其流始深共一千  
三百里而至襄陽襄陽以下江面較大自沙陽以下雖港  
汊紛歧其正流之趨漢口者流極迅急故言漢防在洵陽  
縣高壁洋以上夏秋水漲可據岸爲守冬春非淘沙布樁  
不足禦也

漢江俗稱神河其異於諸水者當夏秋漲發中有跑沙突  
起洪濤之中出沒無常舟人步步留心見有跑沙拚命急  
避如不能避則沙壅船頭頃刻之間人舟均無踪矣跑沙  
在老河口襄陽一帶尙有至襄陽以下則漸次稀少推原

其故緣漢水流最勁疾擁沙而行上游高山夾東愈增其  
猛至襄陽地勢平坦江面寬而水流緩故沙亦漸落江底  
矣

唐時都關中江淮之米多由漢江沂流而上不專恃河運  
史稱明皇幸蜀至扶風江淮貢獻適至其明徵也由老河  
口之上進寨河小舟可達龍駒寨陸路至西安不過四五  
程梁州金州則均在水次軍興之時江西湖廣轉運接濟  
者由漢江而進但漢江灘高流急鄖陽之龍窩洵陽之藍  
灘新灘其險不減灩澦船質稍脆薄遇石輒破江西運員  
彭淑湖北當陽人諳漢江水道所運之米專募湖南永州



剝船船既堅實人亦耐勞故虧耗獨少至湖南糧米多用本省原船省一番搬移卽少一番耗損米又用布袋竹篾裝盛船戶難以偷竊遇有磕損便於起救尤經理之得宜者

漢中府諸水漢江而外無可通舟者西鄉堰口諸流會合夏秋可行小舟然亦僅至西鄉縣城

興安府諸水紫陽之峒河西至四川交界之毛壩關三百數十里可行小舟漢陰之月河春夏瀦而爲堰旣資灌漑之利秋冬小舟運載至郡舟容數石

安康之滔河黃楊河舟行有水時均不過數十里洵陽因

洵河得名源出孝義秦嶺至鎮安西境名大仁河小仁河東折至洵陽與水由舊縣關鎮安縣南注縣境者相會故謂之兩河關會流一百七十里至縣城東入漢俗稱八百里洵河其可行舟者計程四百餘里

鄖西之夾河源出商州之鶻嶺經上津入鄖西境至夾河口入漢對岸爲白河縣地小舟直至蠻川關

斗堵河在漢江南源出竹山縣之上庸山卽古上庸河也盤折二竹房縣之間合孔楊水鰲水龜水並源出平利縣之堵水源出白河縣之北星河其流稍深沿流作堰灌溉稻田小舟牽挽而上可三四百里至鄖縣西南入漢江二

竹房縣民客貿易鄖襄者均此河運載

嘉陵江者東自陝西散關發源由鳳縣略陽諸治西南斜注西自甘肅西和成徽兩當諸縣而來之水合於置口關東入四川之廣元縣境道經嘉陵山之西故以嘉陵名西至昭化縣有來自階州之白水龍安府之青州水注之又納蒼溪縣之宋江梓潼縣之小潼川下至合州之渠口則渠江諸水注之南下至州治之東南入於涪江按嘉陵江兩面夾以高山水流湍急然至陝西之略陽其流已鉅可通舟楫較漢江之在褒沔者爲深廣矣

渠水源出陝西之定遠廳大巴山下至巴州東南分爲三

流而中央橫貫勢若巴字名曰巴江又稱字水合源出廣元縣通平鎮之清水江源出通江縣之宕水龍灘水由金華山西斜注東南有通川江者發源達州之萬頃池自東注之江南下渠縣之東又爲渠江納渠縣之白水溪大竹縣之東流溪廣安州之翁水至合州之渠口合於嘉陵江此水舟楫直通巴州其分支別派間亦可泛輕舸

開江源出新寧縣霧山坎流而下南入開縣合源出達州萬頃池之清江源出高梁山之墊江俱下雲陽入於岷江此水雖蟠折山谷中而小舟尙可運載

馬連溪源亦出於萬頃池自北而南下經大寧縣之西又

南入巫山縣與大寧河並入岷江亦通小舟

岷江源出岷山自松番衛西北至番界三支並下至下游諸郡漸次會合東下湖北之巴東縣而入楚界其間若金沙江則自雲南之北勝州總滇省西北諸支流至四川之馬湖而入江嘉陵江則自陝西之寧羌州總甘肅東南諸水至四川之合州會涪水而爲內江合三省之水盤折數千里源遠流長故與黃河各爲南北衆流之長江之在川者兩岸東以高山川楚之交石峽千餘里至彝陵以東始入平原故自來江患蜀地絕少然峽愈峻水愈深流愈迅急順流而下瞬息百里沂流以上則處處皆險灘瞿塘灩

瀕特其名之最著者耳故輸輓維艱

三省邊境可通舟楫者只此數水渭河源發甘肅渭源縣之南谷山東由鳥鼠山而下經清水縣而西入鳳翔府之寶鷄縣繞扶風武功盩厔郿縣而行並非山內也

山內陵巒峻大溪澗亦多當夏秋雨潦旣降山漲暴發波濤之急山民名之曰竹筒水無舟楫可通尋常咫尺之地守候輒至經日又古稱雉蛇交其卵遇雷入地久而成蛟山內蛇雉最多百姓不知伐蛟之法蛟起崩山裂石坡坳之間廬舍人畜被山水推去者往往有之山民不以爲奇也蛟將起時有聲閣閣類雉鳴而較閱以此偵之可以預

避

山內地廣賦輕惟商州與漢中之南城洋西徵銀間及萬兩興安及四川之保寧夔府湖北之鄖陽宜昌各郡縣極多不過三四千小邑祇數百數十兩緣當國初定賦之時多係未闢老林故率從輕科

國初定賦之時原定之額不能符數募人領地承賦而土著之民無多其承納之國課不過幾錢幾分領地輒廣數里至離縣窻遠者一紙執照之內跨山踰嶺常數十里矣完課既爲無多故其賃佃之租亦不似外間之按畝而定也

老林未闢之先狐狸所居豺狼所嗥而虎禍尤多土著人少所種者不一二招外省客民納課數金輒指地一塊立約給其墾種客民亦不能盡種轉招客佃積數十年有至七八轉者一戶分作數十戶客租只認招主並不知地主爲誰地主不能抗爭間有控訟到案則中間七八轉之招主各受佃戶頂銀往往積至數百金斷地歸原主則客民以青山開成熟地費有工本而頂銀當照據轉給中間貧富不齊原主無力代賠則亦聽其限年再耕而已

流民之入山者北則取道西安鳳翔東則取道商州鄖陽西南則取道重慶夔府宜昌扶老攜幼千百爲羣到處絡



繹不絕不由大路不下客寓夜在沿途之祠廟岩屋或密林之中住宿取石支鍋拾柴作飯遇有鄉貫便寄住寫地開墾伐木支椽上覆茅草僅蔽風雨借雜糧數石作種數年有收典當山地方漸次築土屋數板否則仍徙他處故統謂之棚民

開山之法數十人通力合作樹巔縛長絙下縋千鈞巨石就根斧鋸並施樹既放倒本幹聽其霉壞斫旁幹作薪葉枝晒乾縱火焚之成灰故其地肥美不須加糞往往種一收百

數十年前山內秋收以粟穀爲大莊粟利不及包穀近日

遍山漫谷皆包穀矣包穀高至丈許一株常二三包山民言大米不耐飢而包米能果腹蒸飯作饘釀酒飼豬均取於此與大麥之用相當故夏收視麥秋成視包穀以其厚薄定歲豐歉

清野之策可行之山外而不能行於山內溪河兩岸早麥三月已有熟者低山之麥以五月熟高山之麥則六七月始熟包穀種平原山溝者六月底可摘食低山熟以八九月高山之熟則在十月包穀既熟其穗倒垂經歷霜雪則粒更堅實山民無倉收貯往往旋摘旋食歲潦則望高山之收歲旱則資低山之熟不能禁民間力作無高低早晚

之分持清野之說日下符檄督責州縣徒滋兵役擾累於事無濟也

山民餽粥之外鹽布零星雜用不能不借資商賈負糧貿易道路遼遠故喂畜豬隻多者至數十頭或生驅出山或醃作脯轉賣以資日用

山內營生之計開荒之外有鐵廠木廠紙廠耳廠各項一廠多者恆數百人少者亦數十人賊匪滋事之始有議以各廠多恐被賊裹誘當嚴行驅散者是大不然凡開廠之商必有貲本足以養活廠內之人必有力量足以驅使廠內之人工作本利其貲值帖然爲用各商護其貲本偵探

賊踪往往較官府爲真於開廠之地必擇險峻可守之處  
結寨屯積糧食賊至搬藏其中賊不能裹也若不准開廠  
則工作之人無資以生添數十萬無業流民難保其不附  
從爲亂故只當聽其經營不可擾也至於聯絡各廠各設  
卡倫無事安心工作有警協力防堵則耐勞習儉之人更  
有得其實力者是在良司牧之善駕馭矣

叢竹生山中遍嶺漫谷最爲茂密取以作紙工本無多獲  
利頗易故處處皆有紙廠山內險阻老林之虬幹蠲枝固  
爲一端而挂衣刺眼令人不能展布則叢竹之爲患更烈  
竹筠常青春燒不然多有竹廠砍伐非惟利民亦可除害

川陝邊徼土著之民十無一二湖廣客籍約有五分安徽河南江西各省約有三四分五方雜處無族姓之聯綴無禮教之防維呼朋招類動稱盟兄姻婭之外別有乾親往來住宿內外無分奸拐之事無日不有人理旣滅事變所以頻仍也

開山種土良民儘多其間與匪徒相比者亦自有故山內村落絕少不過就所種之地架棚築屋零星散處所稱地鄰往往嶺谷隔絕匪徒竊劫難資守望之力孤掌難鳴不敢與匪徒爲難也

教匪之煽惑山民稱持咒唸經可免劫殺立登仙佛愚民

無知共相崇信故入教者多其實別無伎倆所云驅鬼役神剪紙撒豆之術特好事者神奇其說荒誕之辭耳其拒抗官兵則各處痞徒之附從者賊中有老掌櫃少掌櫃妄稱掌教元帥則真教也其妄號領兵元帥則痞徒之出力格鬪者賊匪竄匿山中遇丁壯輒裹之反縛令負糧跟走惘惘行山谷中十餘日去鄉已遠漸釋其縛逼令刺殺所擄之人以堅其心不則謂無用轉殺之矣故兵獲裹脇供亦多稱殺人要非其本心也

賊擄十數歲小孩教以擊刺稍大者號曰毛牯錐次者號曰馬娃子此輩幼小無知以殺人放火爲頑戲便捷輕銳

如錐如馬故以爲名

嚙匪之在山內者較教匪爲勁悍往往於未闢老林之中斫木架棚操習技藝各有徒長什伯爲羣拜把之後不許擅散有散去者輒追殺之

山民貿易定期赴場場有在市旁者亦有開於無人烟之處曰荒場當山貨旣集如有嚙匪猝至則場頭恐其劫掠斂錢相贈所全者多未可遽以通盜繩也

匪徒之聚大抵皆由賭博山內地雖荒涼而賭局絕大往往數百兩千兩爲輸贏之注無錢以償流而爲盜其賭自造寶盒彈錢擲骰不打馬弔不鬪紙牌也嚴明守令能禁

賭博卽爲清盜之源

匪中有領帳房之名用青布數十疋縫大帳房一二具板棹皆備遇民間紅白事頭人持帖送分張帳於其家號曰款客戚友弔賀坐其帳中卽入賭局家中稍有貲產者百計誘騙或用酒灌醉但一言入場卽爲代賭所輸之數勒主人作保擔任強搶牛馬逼買田產無所不至此類領帳房者必匪中豪長與胥役兵丁多相勾結甚至衙門家丁受其歲遺陋規官府設法擒拿非聲東擊西鮮不透漏脫逃也

匪徒有紅錢客黑錢客之分黑錢者爲鬼爲蜮換包設騙



行踪詭秘多以術愚人紅錢則作會結黨持刀執鎗白日市廛地方紳耆保正無敢過問兵役獲其夥犯中途攔截名曰打炮火邊徼地方官固宜潔清自好尤須兼通方略如過於拘謹不能除害則良民不能安靖

山內官吏士民行走數十里無不攜有軍器以防賊匪賊人暗藏利刀質小而銳名曰黃鱔尾遇追捕緊急挺持格鬪我無利器則爲彼戕害伊何道而賣刀買犢也

山內各色痞徒閒遊城市者統謂之閒打浪此輩值有軍興則充鄉勇營夫所得銀錢隨手花消遇噶匪則相從劫掠值兵役亦相幫搽捕不事生業總非善良閒打浪旣久

便成嚙匪嚙匪之衆卽爲教匪流賊能令地無游民則盜賊自弭矣

三省亂民平定之時新添營汎用資彈壓有新營卽有新兵多係降匪鄉勇充當賊匪之殺其夥黨赴營投誠與鄉勇之從征日久無籍可歸者遣散恐滋事端是以收入營伍但此輩本非善良殺人放火習慣成性詎能安守營規又當從征之時口糧優厚打仗有賞殺賊有獲飲酒食肉日日醉飽入伍則有限餉銀不能恣其口腹宜其難以帖然也

邊地兵餉有宜變通者賊匪未滋事之前山內糧食絕賤

大米每石價值不到白銀一兩包穀雜糧每石只青蚨三四百是以往時糧餉盡爲給銀原爲便兵軍興以後山內連歲荒旱略有收成下游客商搬運大米一石價常在三兩以外包穀亦須二兩上下糧食艱貴陳兵在營日久或薄有田產或兼營生理尙可勉強支持新兵於餉銀之外別無津墊生計更難爲各營籌者每人按月發給本色兵米三斗餘銀仍爲鹽菜不至糴貴受累自當漸次安靖新兵之爲山內患端倪已見然兵有定額得賢明將官善爲撫綏駕馭則其患可弭其中更有可慮者在撤退鄉勇當凱撤之時從征已數年賞銀數兩恃其微勞多懷怨望

雖云遞送回籍而所注籍貫本非真實到籍並無親族收留仍然四竄又或以在外日久無顏回里每至中途逃逸復圖入營此項已撤鄉勇逼留山內者實繁有徒無事則爲閒打浪遊蕩村寨墟場有警則防其乘間抵隙但無故查辦徒生釁端隱爲安輯之方消其不平之氣尙宜勞心區畫

山內防維之策總以安輯流民爲第一要務流民開山作廠旣各安其業奸徒亦不能以煽惑卽偶有蠢動而各保身家長鑱白挺盡成勁旅好亂之奸民終不敵良民之多也山內差役多客民充當無風生浪遇棚民有事敲骨吸

髓弁兵亦多附和爲奸如今日檄令查某寨明日差令禁某事地方驚遠山民受其凌虐無可告訴卽間有告訴無爲申理囂然無復有生之樂一二奸徒倡率爭相附從則禍變成矣賢明監司太守十數人落落分部三省邊境軫恤民隱勤於稽察俾在官人役不能逞其奸蠹伎倆則土流安業潛布之撤勇易於謀生自不至輕有生心此尤拔禍本塞亂源之要務也

保甲本弭盜良法而山內州縣則只可行之城市不能行於村落棚民本無定居今年在此明日在彼甚至一歲之中遷徙數處卽其已造房屋者亦零星散處非有望衡瞻

宇比鄰而居也甲長保正相距恆數里數十里詎能朝夕稽查而造門牌取互結斂錢作費徒滋胥吏之魚肉至客店之循環簿亦只可城市用之外省流民入山多寄宿林岩匪徒則山徑取捷均不安歇客店所謂客店者不過貿易山貨之小販而已各縣邊境距治恆數百里如客店必照例造報月一陳核則僕僕道途不勝其苦矣

山中打生獵戶平時專驅除虎狼之爲民害者其火鎗百不失一五溪蠻無以踰之又各廠中防噶匪劫掠有標客拳勇技擊一可當十壯士朱方伯從軍時捐重貲募得數百人護輜重故獨無失亡或大軍有急揮此輩援之往往

轉敗爲勝古名將破賊必畜選鋒此皆足備軍鋒之用不  
事外求者矣

州縣民壯例本與兵一體操演設以衛庫獄者近則只以  
喚詞訟提人證操演二字絕不提及蓋通弊也山內則有  
不得不講者地方遼闊城守之千把汛兵數十名解犯送  
差而外存城幾人偶有盜賊文武措手無策亦決不敢向  
前摻捕以致浸釀事端竊以山內民壯當相縣之大小大  
縣設一百四五十名小縣亦必一百名責成縣官勤加操  
練每名歲支口糧一十二兩此項經費卽查明從前叛產  
絕業將佃租動撥自可敷用

開屯田設堡卒二議往嘗陳之當事顧治法非難治人爲  
難曉事任事之人百難一二事機各宜有時過時則無可  
籌辦未敢仍持前論也而於山內興利除害尙有臆見可  
備芻蕘者國家承平二百年於茲矣各省生齒繁盛浸有  
人滿之虞無業窮民勢難禁其入山開墾守土者善爲撫  
馭廣其資生之路則彼方藉以仰事俯畜詎至卽爲亂階  
昔文王治岐木拔道通而化行江漢風雅所載甯盡虛言  
南山大巴山化龍山城口圍城等處募商開廠斫伐老林  
木料浮江漢而下直達三江五湖旣可裕國課而濟民用  
而老林旣開墾荒耕種盡皆腴地於此數十里中添設州



縣可養活無數生靈通計老林非二十年不盡開墾地則歲歲有收此百年之大利也至老林既開各山之真面目皆出無蔀蔽以增其險奸徒不能藏匿則又利興而害自除矣

開林之時地方官恐設廠之時民客龐雜難以盤查彈壓固是一端而又有苦其地勢之難行者連抱之材詎人力所能運必藉水勢而山中溝渠往往有亂巖擁塞步步阻滯商民卽願出貲開廠不肯捐本疏川也且林木斫下往往候水經時山漲暴發木植隨湧而下爲下流撈救不肯收贖則徒折貲本故無肯爲開林之計者然山既有脈水

卽有路沿途巖石可設法以錘鑿山高者水自大巨木亦可放下如洵陽鎮安孝義各老林十數年來斫伐結牌直下老河口者不少卽以巴山而言東北二面近西鄉者山水本歸漢江則木亦可放之至漢西南二面山水本歸巴江則木亦可放之至巴巴山之木爲廠客所伐者均令刻字作號漢則下至興安鄖陽江則下至夔府宜昌均准撈救收贖而於夔宜興鄖設關稽查現孝義鎮鄖各木客遇水漂失者甚多然於百株之中能留二三十株卽爲獲利以林木質大而價重且多松柏花梨美材可作器具不止房屋板片之用也百姓可與樂成難與慮始得賢能地方

官籌出數千金試爲疎導山脈水道旣開幕商開林一處有利則他處自皆倣行南山團城分別由江由渭各隨地宜聽客商臨時斟酌久之自有成效也大利旣興民聚雖多足以養活官府留心稽查可不至別生事端

團練之法有疑其勞民者是大不然當賊匪蠭起之時山內州縣豈能處處用兵防守團練之衆雖不足以當大賊而聲勢旣張則小隊賊匪亦不敢輕有窺伺查賊匪將至必先有賊探偵視無備乘虛而入團練旣成每月操練兩次不過費兩日工夫其餘二十八日儘可力作若不團練則賊匪日日滋擾地方光棍加以恐嚇百姓日藏山洞不

敢耕種其廢時荒業爲何如古人稱平賊方略徵調不如  
招募招募不如團練然總須相兼而行則戰守有資矣團  
練雖民間自捍桑梓亦須官府激勵少爲貲助故於有事  
地方上官當量爲調劑俾得展布始可責以固境保民也  
供運之方當於要路各寨預爲儲備者蓋當官兵臨境之  
際必賊匪滋擾之時設法供運亦防賊匪攔搶也而供運  
之人尤有當斟酌者竊嘗謂用家丁不如用差役而用差  
役不如用紳士家丁入山行李先自累墜路徑不熟聞賊  
胆怯往往糧運不到浮開運脚使費差役路徑熟悉兼恐  
誤差責懲而人夫不受約束是以亦難得力紳士則居住

寨堡之中其心急欲官兵殺賊地方寧靜事雖公而切己辦理較實心也地方官於寄糧寨堡擇紳士耆民之謹厚可靠者先給發運營銀兩屬其官兵一至便行轉運寨堡中多其子弟親貫共顧顏面必相助運送決不敢誤此在地方司牧平日官民一氣有以作其趨事赴公之誼自然休戚相關也

聽訟雖非致治之源而閭閻受累實由於此山內尤甚川楚民情本自好事加以光棍包攬教唆鼠牙雀角便成訟端差役手奉一票便爲奇貨可居邊境距州縣窺遠者往往將所喚之人羈押中途客店店主串通一氣彼此分肥

爲之關說所欲旣遂則回稟未票之先已往鄰省索詐未  
遂或更有株害之人則云喚至中途被某某等糾衆搶回  
稟請加票喚至城中又羈之保戶屢月經旬不得質訊差  
役坐食兩造飯銀差費一訟所用動至累百至命案之鄰  
證盜案之開花一票尤必破數家民苦莫訴幾何不胥民  
而盜也地方官嚴勒限期相地遠近計日審結案無留牘  
獄無繫民民保而盜自弭矣

康熙年間川陝總督鄂海招募客民於各邊邑開荒種山  
邑多設有招徠館又飭州縣選報紳士耆民充爲鄉正宣  
講聖諭城中朔望山內場集均爲演講責成地方官實力

奉行風俗丕變盜賊稀少百年以來父老傳爲盛事則善政之化民成俗卽邊徼亦未必不可舉行是所望於志希循良者矣

陽城之言撫字心勞催科政拙仁吏之用心也山內徵收悉從輕則民間尙有受累者害不在官而在差役與地棍也蓋山民應完錢糧多是幾分幾釐而距州縣往往數百里至縣城又不能卽上庫給照往返動至兼旬則此幾分幾釐者非一二金不楚矣山民不能自完則差役地棍於開徵之時將山內花戶代爲完納名曰截糧官利徵收之早畢不復稽查照票一入伊輩之手故爲挨延俟至次年

開徵向花戶催索陳欠花戶不知已完懼以陳欠到官任其魚肉於是算本利索路費用費一照非數金不得矣嘗詢山中紳耆均稱錢糧不踰千兩而民間有數萬之累非虛言也良司牧隨到隨收又或分期下鄉聽其就近完納徵銀不滿一錢者准以銅錢完納此卽催科中之撫字也滇黔粵嶠之間石山亦峻嶒可畏顧其所謂石山者石自爲石不甚與土雜也山內則不然石雜土中不相連屬夏秋之際霖雨經旬土成浮泥力不能以綴石巨石由山巔徑滾而下當久雨新霽行人常有戒心否則裂石砰擊未有不立碎者矣



山內石雜土中無不可種之山此其所以爲利也而道路之不能修亦卽由此蓋上盡浮泥經烈日暄晒則堅如石塊鋤歛難施募人開挖甫得平夷及大雨時行巨石之隨行潦下墜者又復堆積沿途加以藤蘿叢竹之蒙蔽旋翦旋生夏秋之間征人之苦較勝他處

山中石多而性浮非獨雜在土山者雨多必至砰裂卽一望懸崖本自石骨崢嶸而久雨之後亦自時時崩墜故寨堡之倚岩而結者往往下木椿於石穴之間方得堅固

山內土性不堅南城洋西各邑號稱平衡其土力亦不敵山外西鳳各郡也所築堡城卽加工夯築一經霖雨便至

坍塌惟處處有石尋得脈絡用鐵槩籤入擊以巨鎚用力推擠卽翻騰而下取石甚便作堡者用土不如用石爲工省而堅但其石性本酥巨石只砌根基五尺以上決不可用恐其質重壓碎也

山內氣候有與外間不同者南山大巴山團城之屬積雪至夏初方消至八九月間又霏霏下雪矣十月以後土結成冰堅滑不可行陟高者用鋤挖磴扳援樹枝而上故摻捕之師一至冬令則馬隊不能得力也

定遠太平鎮坪城口各處山大林深天開一井常多陰雨卽晴霽亦有濛霧霧中多硫磺氣感觸之者輒生膨脹瘡

痢之疾又盛夏之時必有數處下雹小如彈丸大或盈拳將包穀雜糧打倒人畜急避林岩中亦凝陰之氣所成也惟下雹之處不過一線長有至數十里寬不過數里糧食非成熟之時雹過後山農扶培尙可吐穗結實也

鼓鑄之利不惟不可禁止尙有當講求者山內古稱陸海雖亦間有銅鉛各礦非常產也而產鐵礦之地則甚多聽外間客民就地爐冶雇募工作固足養活無業之人而作爐必近老林砍伐以供薪木之用久之而老林漸開肥以春燒可種之土愈廣棚民亦收耕作之利矣

山內有耳扒者將青桐木砍伐作架至次年漸生耳其利

可以三年耳盡而新蓄之青桐木又可作枋再有作蕈枋者另是一種木間有取松樹爲之洵陽則出構榱狀如麻蘇廣爲紗羅者參用之此數種均山貨之貴重者

原傑於鄖陽奏設巡撫將山內州縣遼闊者分設縣治洵安邊大猷也惜其所籌辦者祇爲秦豫楚三省交連之處未謀及秦蜀也山之在楚豫者雖亦高大而未逮秦蜀之嶮峨且老林深箐多在秦蜀接壤川東北郡邑之邊秦者距成都往往二千數百里視鄖陽之距武昌更迢遙矣至縣大難以兼顧如太平之城口洋縣之華陽安康之磚坪平利之鎮坪者此類尙多當時並未議及豈今昔情形不

同固有待於後賢乎

添營不如分縣營資彈壓而已未能責以撫綏導教也且設立營汛雖增添額兵其民不能增也縣則訟獄者往焉輸納者集焉考試之生童聚焉久之客商移住漸成都會得賢司牧勤於治理勸農興學則民風可以不變至審事完課考試均皆便民又不待言矣如以邊地瘠薄縣官窮苦則新設之地酌以邊俸論陞加之鼓勵當有自奮於功名者矣

堅壁清野均制寇良策山內之野難清已論於前至堅壁之謀則行之確有成效五年以前賊勢之熾者以其到處

裹人脇從日衆搶掠民食因糧於我也自寨堡之議行民盡倚險結寨平原之中亦挖濠作堡牲畜糧米盡皆收藏其中探有賊信民歸寨堡憑險拒守賊至無人可裹無糧可掠賊勢自衰矣

寨堡之設固足保民而於勦賊機宜亦大有裨益賊匪奔竄山谷不由路徑官兵盡力窮追相距總隔一二日程以其前無阻截之者也寨堡旣成加以團練賊至據險以拒大兵跟擊得及鮮不獲大勝者參贊德侯追樊人傑徐添德兩賊首賊匪晒淺渡漢因前途有馬鞍寨之險少爲逗留而德侯親督健旅追及之張家坪斬俘數千樊徐二賊

勢遂窮蹙不旬日均皆殲滅又老賊張添倫等合七股大賊萬餘人攻打太平寨神仙洞二處者兩日楊提軍領兵至神河口聞之連夜前進天甫明而至賊營寨民扼之於後官兵勦之於前七股賊匪一戰盪平此尤彰彰在人耳目者

山民質樸勁勇耐勞習險非平原百姓氣浮而脆者可比果其團練得宜賊匪畏之相遇輒曰土豹子可恨蓋賊匪之用以勞我師者我兵必分道架梁而賊匪翻山踰嶺其來如虎其去如鼠跟追倏無踪跡也山民則不然賊匪之能皆山民所自具而賊匪之路徑又不逮山民生長其地

爲更熟也但訓練之時有宜與首人講論者百姓非兵勇  
難以法治可勝不可敗如傷數人則餘皆鳥獸散銳氣挫  
矣賊來勿迎頭攻擊沿途分伏壯健於山灣石角之間賊  
匪大隊過去必有拉後之數十人委頓道途間突出截擊  
可以盡擒前寨旣用此計後寨亦依計而行之則賊所過  
寨堡必有損折又賊於夜間亦有住紮地方附近寨堡揀  
壯健於夜靜更深時用大砲過山鳥遙擊之縱不能多殺  
賊而徹夜不得息必驚惶拔走明日至他處又復如此則  
賊益疲罷拉後被擒者益多我不勞而彼已不支鄉兵困  
賊之至計也



西安各峪口賊初頻頻窺伺後素觀察團練民勇徧設卡  
倫分布防堵時屬紳士震金鼓揚旌旗分隊巡邏聲勢甚  
雄壯賊不敢犯平原所保全勝者甚大亦可知團練之成  
效矣

團練鄉民不過令其保聚無遭蹂躪非欲以此邀戰功也  
教習之時令其演火鎗擊石子能於百步外中靶爲上不  
必令習刀矛蓋刀矛決生死於五步之內百姓各有身家  
不值與必死之賊拚命火鎗則擊之百步之外度不能勝  
尙可爬山而逸至於善擊石子則猝遇賊匪手無器械地  
下石塊即可抵禦所謂沒羽箭也以守寨堡尤宜較之火

鎗費省而力相當

團練之法各寨寨勇設寨長寨副大旗小旗以次分管寨長必須寨民公保承充十數寨必相其人之多寡爲設寨總選紳士之有才幹爲衆所服者充之近邊要隘則各寨輪撥數人設卡守之當東作之時百姓分布耕種防匪之突至各卡於高山眺望偵有賊踪放一砲則耕作之人盡皆收檢農具偵賊向此路則放二砲人畜皆歸寨堡賊近則放三砲寨總糾會各寨盡整器械集壯丁堵禦前卡信砲旣放後卡聞聲接放頃刻之時數百里間咸知警備賊至不放砲與非賊至放砲寨總查出均卽稟官嚴懲

偵探不明便至誤事而探卒難得其人往往於中途逗遛數日回則糊塗捏報團練既行於各邑沿邊小心寨總各給木戳探止本境者其探票內必要取寨總戳記如至鄰省鄰邑飭令所到營縣稟請於票內加用印信以杜道聽塗說之弊寧優給口糧票內無戳記印信必加重懲

百姓自捍身家不能出境勦捕間有地當要衝而本地民力單弱必須得人幫助者當愷切諭以脣齒之義而所調亦止可在數十里內百姓知無遠役地方官又能加之獎勵軫其飢寒自踴躍從事

林中所產老毛竹節密而堅柔而勁賊匪砍作矛桿長一

丈七八尺拒抗時千矛攢刺短兵砍撥軟不受刀前矛甫  
開後矛已至賊勢不支則拔出矛頭棄桿翻山形同猿猱  
竄至他處又砍竹作桿前敵之兵火鎗弓箭林內不便施  
放亦用長矛彼此刺擊馬服君曰兩鼠鬪穴將勇者勝信  
哉

平原之中弓箭疏通及遠火鎗亦可得力故賊匪不輕離  
老林蓋屋之役齊王氏率賊匪數萬人出山攻撲王提軍  
營血戰竟日子藥皆盡賊用馬隊直踏而前有山西千總  
崔雯者領藤牌軍二百名跳躍出迎賊馬驚竄自相踐踏  
營中分兵鼓噪繼之賊匪始退次日額侯領索倫馬隊至

盡銳衝殺邊兵猛勇善射一皆當百賊死傷大半逃遁入山自是不敢輕窺平原勦賊之師弓矢鎗矛藤牌均宜分隊練習不可偏廢也

賊匪之疲罷我師一時難於剪除者賊無輜重急則翻山而逸我軍有鑼鍋帳房必繞山溝而行一大山翻過不過數十里而繞山溝取道則二三百里軍至而賊已遠颺經略參贊楊提軍賽將軍諸軍於追賊緊急時輒亦屏去鑼鍋帳房跟踪徑前於崎嶇之處徒步身先士卒故所向克捷

追敵之難固然限於地險然亦多由軍糧之不能接濟賊

匪隨刼隨食不須持糧官軍不能也賊軍日走百數十里官軍亦日追百數十里而負糧夫馬日祇能行數十里往往兵行一日糧兩三日始達乾糧不能多攜不得不住紮待糧寨堡旣成官兵經由處所預先貯糧軍至輒搬運供給庚癸之無呼實資於此

兵以衛民不戢士卒則雖殺敵致果終非雲霓之師也經略參贊所以克奏膚功者拿定保民二字主見先定每當下營村老皆得進見詢問民間疾苦長吏賢否約束弁兵秋毫無犯德侯嘗勦賊西鄉紫陽間四面皆賊督軍前後攻擊軍中缺糧已二日兵軍有掠寨民糧食者立斬以狗

故三省邊民感戴異常聞兩侯營至老幼夾道歡迎經略之卒山內軍民聞之多遙奠痛哭亦可爲領兵者師矣楊提軍嘗言戡定之功固由將弁而實賴地方之司牧賊匪經勝仗之後脅從之衆多乘間自拔地方官不能安輯而任兵役之嗑詐則無路自新又或苦於苛政甘心作賊則所殺之賊不逮所增之數矣卽摻捕之時良司牧功亦有易奏者領兵官於所帶數千人之外不能別有統轄地方官果得民心則所轄數萬數十萬百姓皆爲父子兵寨民於官兵經過多疑懼不敢到營卽偵知賊在前途不來相告也若地方官則賊所至之地保正寨長均須立報得

以預爲準備此皆致勝之要提軍持論如此得弭盜之本  
矣克壯其猷詎偶然哉

戡亂之方不難於一戰而勝之而難於全局而安之又安  
之事寬猛並用曲折周詳巨細必須皆到則司牧之責任  
重矣

岳少保曰文官不要錢武官不怕死天下太平矣穆提軍  
督兵勇二千餘人追勦賊首伍懷志於南山老林徒步當  
先轉鬪千里幾危者數其氣彌厲卒俘伍逆撲滅此股大  
賊其後勦賊定遠通江之間策馬衝陣身中數矛死邊人  
嘖嘖稱其武烈又言有某將軍者領兵不二千人紮定遠



之長嶺川匪萬餘突由竹峪關至定遠之黎壩人心驚惶將軍督軍奮擊却之回軍至九軍壩又遇賊大隊從星子山東來亦徑前衝殺賊敗回竄後聞其屯軍西鄉賊繞道偷渡漢江領軍馳截賊濟大半其未及濟者均爲掩殺嘗奉檄過七星壩舟人指視沙壩死賊背上箭如蝟毛亦可謂敢戰者矣

山內民風土俗已略具梗概關林墾荒毋擾木鐵紙耳各廠凡所爲開財源廣生計俾棚民得各安其業也再於適中之處設重臣以一其事權遼闊之處分州縣以專其治理綏靖之大規不外此矣顧經世大猷兵食並重軍威果

然雄盛自可消侮亂之萌團練之法只可行於有事之時  
若云加增兵額則山內地方如此之廣莫必非添數營數  
汎所能控制者而添數營數汎其議餉議糧經費已不資  
矣屯政雖係古法然有實心任事之人不避勞險安在不  
可舉行卽如新疆苗疆各屯現在均著有成效山內有水  
田之處難以升科而棚民既有水田便成土著亦思爲子  
孫之計亦畏有賊匪之害核其田爲屯業編其人爲屯丁  
卽以現有之田定爲口分世業設屯弁以管束之作屯堡  
以團聚之寸土顆粒官無利焉再爲清出叛產絕業收其  
租課以供屯務之雜用分派素得民心之司牧愷切開導

使山民曉然知此事之爲己如此則屯政可行山內稍平  
衍之處皆有屯堡則氣完勢重稽防先自便當各老林聽  
棚民開墾雖有匪徒潛竄而我整彼散我主彼客不得逞  
其奸謀兵寓於民洵久安長治之規也良醫療病用藥固  
有加減而方恆傳之古人是所望於集羣思廣衆益者矣

嚴樂園先生以洵陽知縣起家官至陝西按察使南  
山盜起身在行間先後幾二十年嘗建議請仿古梁  
州自爲一道及前明鄖陽巡撫例割三省邊郡專設  
大員鎮撫廟堂重更張未遽施行今雜識首言乂安  
之策必合三省通籌卽其旨也據先生自序此書成

於嘉慶十年後道光時復增輯爲邊防備覽總十門  
一十四卷辭甚宏括然規畫要略已具於此後世談  
兵形險要者讀其書通其意隨時變通而善用之一  
隅之法推之以治天下不難也又多乎哉光緒戊申  
八月胡思敬跋

三省山內風土雜識終

跋

右三省山內風土雜識清淑浦巖樂園先生撰先生宦轍所至如洵陽定遠皆在萬山中毗連川楚犬牙相錯又值用兵盜賊出沒防不勝防先生相地要隘築堡練團令民且耕且守且戰並用堅壁清野之法成效昭然卒平巨亂此編當爲是時所作胡氏刊入問影樓叢書且謂三省邊防備覽一書權輿於此非泛記風土者所得並論也先生由守令陟分巡先後在陝南垂二十年政教所被感人最深是書首篇卽謂乂安之策必合三省通籌之實爲經國大猷邵陽魏氏默深所云割地設省亦不外此比歲疆圉

多事兵家有言貴知彼己循是以求進止方略得其肯綮  
矣原本印行無多先生守土於斯關中流傳獨缺亦一憾  
事矧其為邊防門戶地利所資尤有不容散佚者不獨甘  
棠之慕宜爾也民國二十四年六月校

長安宋聯奎

蒲城王健

南鄭林朝元

古三管山內風土雜識

古三管山內風土雜識

古三管山內風土雜識